



Äntfert vum Här Henri Kox, Minister fir bannezeg Sécherheet op d'parlamentaresch Fro n° 5412 vum 20. Dezember 2021 vun den honorabelen Députéierten Laurent Mosar a Léon Gloden

Ad 1):

Den Här Minister ass frou datt d'Manifestatioun vu leschtem Samschdeg ouni gréisseren Tëscheffall iwwert d'Bün gaang ass an dat keng Persoun zu Schued komm ass. Et war ërem eng aussergewöhnlech Situatioun, mat villen Inconnuen. D'Police war gutt preparéiert an huet och leschte Samschdeg ërem eng exzellent Aarbecht geleesch.

Just en Deel vun den Manifestanten hunn sech un d'Regelen gehalen. Den Här Minister verurteilt natierlech d'Virgehensweis vun deene Manifestanten, déi sech net un d'Virschreften (net ugemellte Manifestatioun a net am ausgewissenen Zoning) halen an doduerch d'ëffentlech Uerdnung gefäerden a stéieren an drétt Persounen souguer a Gefor brengen. Si setzen domat hir presuméiert Rechter virun d'Rechter vun all deenen anere Bierger an d'Rechter vun der Allgemengheet. Dëst ass ze verurteilen an gëtt och net toleréiert. D'Police huet dowéinst déi néideg Rapporten un d'Justizautoritéiten weidergeleed.

Ad 2):

De Sécherheetsdispositif gëtt op Grond vun den Informatiounen, déi am Virfeld vu gemellten oder net gemellte Manifestatiounen bekannt sinn, vun der Police evaluéiert an decidéiert. Den Oflaf vun enger Manifestatioun gëtt dann tëscht der Police an den entspreche Gemengeverantwortle beschwat. Den Encadrement vun de Manifestatiounen ass deemno eng gedeelte Kompetenz déi an enker Zesummenaarbecht mat der Gemengeautoritéit koordinéiert an ëmgesat gëtt.

Aus den Erfarungen vun der Demonstratioun vum Samschdeg den 11. Dezember gouf decidéiert de selwechte Manifestatiounszoning auszeweisen, well fir deen Dag ërem vill Leit an der Stad erwaart goufen an eventuell Stéierungen ze erwaarde waren.

D'Madamm Buergermeeschter requisitionéiert d'Police (mat der Méiglechkeet vum usage de la force je no Situatioun) an de Policeminister huet der Police souwuel d'Ennerstëtzung zougesot fir belsch Polizisten unzufroen wéi och den Artikel 5 vum Policegesetz a Kraaft ze setzen, fir der Police d'Identitéitskontrollen ze erlaben. D'Benotze vun der Gewalt wéi och vun der Identitéitskontroll am Kader vun de Limite vum rechtlechen Kader ennerläit der Aschätzung vun der Police.

Leider huelen d'Organisateuren kee Kontakt mat der Gemeng Lëtzebuerg oder der Police op, fir am Virfeld de Kader vun der Manifestatioun ofzeschwätzen an en geuerdneten Oflaf ze garantéieren. Am Géigendeel, oft gëtt souguer probéiert, fir keng Informatiounen präiszeginn a sech an der Anonymitéit vun der Mass ze verstoppen, fir d'ëffentlech Uerdnung bewusst kennen ze stéieren. Wann et also zu enger on-ugemellterer spontaner Manifestatioun ausserhalb vun dem festgeluechte Zoning kënn an zu spontane Regruppéierungen, kann d'Police dëst eréischt erkennen, wann des Gruppéierung sech scho forméiert huet. D'Police muss dann ofweien, op wéi eng Art a Weis mat der Situatioun ëmgaangen gëtt, ënnert der Optik fir d'ëffentlech Uerdnung ze garantéieren an am mannsten ze perturbéieren. Déi politesch Responsabel hunn dofir am Virfeld der Police, wéi uewen beschriwwen, déi néideg Moyenen zur Verfügung gestallt, d'Madamm Buergermeeschter duerch d'Requisition mam usage de la force an den Här Minister duerch d'Akraaftsetzen vum Artikel 5 fir Identitéitskontrollen duerchzeféieren.

Gläichzäiteg gëtt ëmmer versicht dat keng Persoun oder Material zu Schued kommen.

Et gëtt keng gesetzlech Basis fir een Demonstratiounverbuuet auszeschwätzen. Grondsätzlech dierf um ganzen Territoire vun der Stad Lëtzebuerg manifestéiert ginn, soulaang sech un de "règlement général de police du 26 mars 2001 tel que modifié le 23 novembre 2015" gehale gëtt.

D'Aktioun vun der Police ass ëmmer a Proportioun zu den Handlungen vu de Manifestanten. Deemno gouff bei der Manifestatioun leschte Samschdeg vun der Police decidéiert dat et am beschte wier d'Manifestanten bei den Manifestatiounszoning ze begleeden fir keng zousätzlech Konflikter ze riskéieren oder Drëtter zu Schued kommen ze loossen.

Et ass deemno onméiglech sech am Virfeld esou opstellen dat ka garantéiert ginn dat all Tëschefall verhënnert ka ginn. Wann op Grond vun enger Gefoerenofschätzung et fir neideg befond gëtt, gëtt de Sécherheitsdispositif fir déi nächst Maniferestatiounen ugepasst.

An Ofsprooch mat all den Akteuren gouf e vergläichbaren Dispositif fir dëse Freideg festgeluecht (Zoning, Artikel 5, réquisition mam usage de la force).

Lëtzebuerg, den 23. Dezember 2021.

De Minister fir bannenzeg Sécherheet,

(s.) Henri KOX